

30 APR 2001

RAJA PERLIS TERIMA DARJAH UTAMA SERI MAHKOTA NEGARA

KUALA LUMPUR, 30 April (Bernama) -- Perdana Menteri Datuk Seri Dr Mahathir Mohamad hari ini menyampaikan Darjah Utama Seri Mahkota Negara (DMN) kepada Tuanku Syed Sirajuddin Almarhum Tuanku Syed Putra Jamalullail, sempena pertabalan baginda sebagai Raja Perlis pada 7 Mei ini.

Dr Mahathir menyampaikan darjah kebesaran itu sebagai mewakili Yang di-Pertuan Agong Sultan Salahuddin Abdul Aziz Shah, yang sedang melakukan lawatan negara empat hari ke Korea Selatan bersama Raja Permaisuri Agong Tuanku Siti Aishah.

Raja Perempuan Perlis Tengku Fauziah Abdul Rashid berangkat hadir pada istiadat itu yang diadakan di Istana Perlis di sini.

Selain kerabat diraja Perlis, yang turut hadir isteri Perdana Menteri, Datin Seri Dr Siti Hasmah Mohd Ali dan Ketua Setiausaha Negara Tan Sri Samsudin Osman.

Tuanku Syed Sirajuddin akan ditabalkan sebagai Raja Perlis yang ketujuh sejak pemerintahan beraja bermula di negeri itu pada 1843.

Baginda menggantikan ayahandanya Almarhum Tuanku Syed Putra Jamalullail, yang mangkat pada 16 April tahun lepas.

-- BERNAMA

MS ZS NMO